

Weeche dem Outdoor-Park, de ersde Deil

Omm letzde Sunndaach omm Stommdisch hawwe merr uff de Schorsch gewart, awwer de Karl hott schunn emol oogefonge: Honnes, ich habb im Blättche gelese, die SPD will enn Outdoor-Fitness-Park mett so Sportgeräte ferr Seniorn in Flerschem ooleeche losse, was hälsden defoo?

Ich saach: Außer dass ich was geeche dess Wort Outdoor-Park habb, weil Outdoor heeßt „im Freie“ unn enn Park iss immer im Freie, gefällt merr die Sach. Ich waaß aach schunn wo merr den hiemache kennt.

Ei wo dann?, frächt de Karl.

Ich saach: Uffen Rathenauplatz. Josses naa, was iss der im Summer so duster. No ja, wenn merrs genau nimmt nor uff de recht Seit, wennde von de Grawestrooß her guckst. Awwer doo iss der so duster, doo konnsde Ängst kriehe, unn deshalb isses aach koo Wunner wennde dort niemols ooner stehe unn babbele siehst unn schunn gonz unn gar kooner siehst, der uff dene Sondstowerfel geeche-iwwer vom Kinnergadde sitzt unn mettem onnern sich unnerhält. Weil dess iss gonz frieher enn Kerchhof gewese unn der Platz iss heit noch doot.

De Karl hott genickt: Midde innere Stadt wie Flerschem iss enn doote Platz, der iss noch dooter als de Adolf ... äh ... de Rathenau. Awwer so enn doote Platz kann merr sich doch heitzedaach nimmi leisde. Der basst doch aach gar nit zu de Champs Elysee von Flerschem, de nei Grawestrooß, uff dere die Leit unner Chinesische Beem flaniern kenne.

Ich druff: Also wär dess mett dene Fitnessgeräte grad was ferr de Rathenauplatz! Doo misst merr nor uff de recht Seit zwaa von dene Beem fälle ...

De Karl hott sofort de Kopp geschittelt. Dess gieht nit, Honnes, dess gieht nit weeche dem Naturschutz, was glaabsde was dess gibt wenn merr die Beem fälle losse wollt. Ich heer schunn jetz die Griene greine.

Ich habb grad weidergemacht. Die sinn doch kronk, die ... die zwaa Beem. Odder?

De Karl hott gegrinst. Unn wenn merr die werklich fälle dut, misst merr ooner defoo beim Abseeche so fälle losse, dass grad uff den nichtsnutziche Brunne fällt, dann wär der aach fort. Weil dem soi Geplätscher hott noch koon oonziche Mensch zum Hiesetze gebrocht.

Ich druff: Koon ononzische, Karl. Unn wenn dess mette Beem gemacht wär, hädd merr enn scheene große Sportplatz ferr Seniorn. Doo kann aach kooner was degeeche hawwe, weil die Seniorn mache joo so koon Krach wie kloone Kinner. Awwer vorher misst merr dem Platz enn neie Nome gewwe, nit ooner von emm dode Politiker, naa, von ebbes was lebt, unn villeicht von ebbes was immer lebt unn nit sterbt – unn was immer lebt unn nit sterbt dess iss unser Flerschem, unn desdeweeche sollt merr den Platz oofach „Flerschemer Platz“ daafe.

Ja, hott de Karl gerufe, Flerschemer Platz, dess wär enn scheene Nome. Unn e bissi später, wenn dort werklich die Alde onn so Geräte torne, kriecht der Platz sowieso enn Uznome, je noochdem was sich dort abspille dut.

Doodenooch war ich widder droo. Also wenn der Platz so schee freigeroomt iss, misst merr dort so drei odder vier Geräte uffstelle. Unn e paar Bänk, dass merr sich noochem Sport hiesetze kennt. Die Sportgeräte, dess kennde große Rädder soi, die merr drehe kann, mettere Brems, die merr oistelle kann unn die dess Drehe leichder odder

schwerer mächt. Onn dem Rad iss e Schild doo stiht druff: „Entwickelt die Muskulatur des Oberkörpers, insbesondere die Schultern.“ Odder merr kann uff wie so zwaa Stufe druff unn macht so als ob merr e Trepp enuff laafe det, unn doo steht druff: „Stärkt die Beinmuskulatur.“ Unn dann sinn doo noch so wackeliche Dinger, doo stellt merr sich druff unn muss uffbasse, dass merr nit erunnerfällt, unn dess iss ferrs Gleichgewicht, um die Wasserwooch im Ohr ze tränniern.

Außerdem kennte doo noch dicke Hölzer leie, die merr stemme odder oofach nor hochhewe dut, je noochdem wie vill Kraft merr noch hott. Aach kann merr sich bicke unn kloone Stoo uffem Boddem sortiern, unn was immer merr mächt, dess iss gut ferrs Kreiz, ferr die Muskele, ferrs Herz unn ferr de Kreislauf. Unn so Sache bringe aach ältere Leit zesomme, die sunnst nit vill mett onnern ältere Leit ze due hawwe wolle odder gar koo kenne, awwer grad die hawwe nooch ner Weil richdische Klübscher, in dene die sich wohlfiehle.

Dess wär nit schlecht, hott de Karl gesaat, allerdings heer ich onnern Leit schunn motze: Enn Sportplatz ferr Ältere – dass ich nit lach! Wer gehden dorthie, ess macht sich doch kooner lächerlich. In Fronkfort kann dess ooner mache unn aach in Hadderschem, doo kennt kooner de onnern, awwer bei uns in Flerschem kennt jeder sovill Leit, von dene werrsd doch ausgelacht, wennde uff so den Platz gehe dust. Onnern wernn saache, was brauche merr so enn Sportplatz, solle die Seniorn doch Nordic Wooking mache.

Awwer Karl, saach ich, dess Wooking iss aach nit jedermonns unn jederfraas Sach. Unn hosde aach schunnemol geheert, was so ebbes kräfdischere Wookerinne monchmol hinnenooch gerufe werdd? Naa? Zu spät, zu spät! werdd doo gerufe. Naa, Wooking muss nit soi. Awwer du host Recht, so enn Sportplatz brauch soi Zeit bisser oogenumme werdd. Wenner mol doo wär missde e paar äldere Leit doodemett oofonge, hiegieh, die Rädder drehe, die Trepp enuff gehe odder enn Balke stemme. Ich det merr dess getraue unn du doch sicher aach, Karl?

Ei klar, gibt de Karl ze Antwort, klar det ich mich dess getraue.

Jetzt habb ich emm Karl zugeprost, habb moi Schnut gedunkt unn habb gesaat: Dann det aach unsern ahle Kumpel Schorsch mett uns uff de Flerschemer Platz zu dene Sportgeräte gehe, unn dann dete mir drei de Oofong mache. De-erst emol dete mir uns uff Bonk setze unn gucke was die onnern mache, unn weil noch mehr uff de Bänk sitze unn gucke was die onnern mache dete mir drei halt uffsteie unn onn dem große Rad drehe unn e paar Hölzer stemme. Unn wenn erstemol e paar Leit oofonge dann dauerts nit long unn die onnern makes nooch.

In dem Aacheblick iss de Schorsch on de Disch kumme unn kaum hadder soin Äbbelwoi bestellt, habb ich gesaat: Schorsch, mir redde grad iwwer die Idee von de SPD von so emm Fitness-Park.

Unn dann hawwe mir dem Schorsch verklickert, dasses gonz doll wär, wenn uffem Flerschemer Platz, also dem Rathenauplatz, so Sportgeräte uffgestellt wernn dete unn dass er unn ich unn de Karl oomol in de Woch doohiegehe wollte um was ferr unser Knoche ze mache.

De Schorsch hott sich omm Kopp gekratzt unn hott gemoont, dess wär nit schlecht, awwer er wollt erst emol mettem Kättche schwätze. Dann hotter vom Fußball oogefonge unn dess Thema Rathenaplatz war ersdemol erledischt.

Eiern Honnes